

An t-Àm ri Teachd Agamsa

Roghainnean Cuspair



Skills
Development
Scotland

My
World of
Work

Cò sinne...



'S e an t-seirbheis dhreuchdan agad



'S e an làrach-lìn dhreuchdan agad

'S e àm-co-dhùnaidh a th' ann! 'S urrainn dhuinn cuideachadh.

'S dòcha gur e do roghainnean cuspair a' chiad cho-dhùnadh cudromach a nì thu san sgoil.

Ma dh'fhaodte gum bi seo a' cur eagal ort, ach tha e brosnachail cuideachd oir bidh smachd agad fhèin air a' ghnòthach!

Agus bidh thu a' faighinn tòrr mòr smuaintean, cuideachadh agus taic air an t-slighe.

Ma dh'fhaodte gum bi na roghainnean a nì thu an-dràsta a' toirt buaidh air an t-seòrsa dreuchd a dh'fhaodadh tu dèanamh an dèidh làimhe, agus mar sin 's fhiach beagan ùine a ghabhail gus beachdachadh orra gu cùramach agus còmhradh mu do cho-dhùnaidhean.

Co-dhiù ma tha fhios agad cheana air dè tha thu ag iarraidh a thaghadh, no ma tha thu fhathast gun sgot, tha e cudromach a bhith a' cumail do roghainnean fosgailte.

Tha daoine ann a dh'fhaodas do chuideachadh a thaobh dè bhios tu a' cur romhad, a' gabhail a-steach an comhairliche dhreuchdan agad, a bhios a' toirt cuideachadh dhut fa leth aig an sgoil agus ann am buidhnean còmhla ri do cho-sgoilearan.

'S e deagh àite-tòiseachaidh smaointinn air càit a bheil thu air an t-slighe agad gu ruige seo, mar eisimpleir le bhith a' toirt sùil air a' phrofaidh phearsanta agad.

Agus bidh an leabhran seo a' toirt seòladh feumail dhut. Tòisicheamaid, ma-tà!

San iris seo:

- na còig ceistean a bu chòir dhut a chur ort fhèin mus tagh thu do roghainnean
- na h-uidheaman air **My World of Work** a dh'fhaodas do chuideachadh gus do roghainnean a dhèanamh
- càit am faodadh tu a dhol le do roghainnean cuspair
- obraichean san àm ri teachd
- **Sgilean Stiùireadh Dhreuchdan** – agus cuideachadh bhon chomhairliche dhreuchdan agad
- a' coinneachadh ris a' chomhairliche dhreuchdan agad.



Chan eil leithid a rud ann ri **cuspairean** bhalach no **cuspairean** chaileagan!

Còig Puingean Cudromach

Tha e fìor chudromach, nuair a tha thu a' taghadh do roghainnean cuspair, gun dèan thu na co-dhùnidhean as fheàrr dhut fhèin.

Thoir beagan ùine gus beachdachadh air na còig ceistean a leanas.

1. Dè tha a' còrdadh rium?
Ma tha ùidh agad ann an rudeigin, gheibh thu toileachas à ionnsachadh barrachd mu dheidhinn. 'S dòcha gun dèan thu nas fheàrr ann cuideachd, ma tha thu a' dèanamh rudeigin as caomh leat.

2. Ciamar as fheàrr leam a bhith ag ionnsachadh?
Mar eisimpleir, ma dh'fhaodte gum bi cànanan a' còrdadh riut a chionn 's gum faigh thu cothrom bruidhinn agus èisteachd, no ealain agus deilbh no cuspairean saidheans a chionn 's gun toir iad cothrom dhut a bhith cruthachail.

3. Dè tha mi math air?
Smaointich air na clasaichean san do rinn thu gu math, ach cuimhnich gur e seo cothrom a bhith a' rannsachadh nithean nach do rinn thu riamh roimhe.

4. Dè am beachd a th' aig daoine eile?
Faighnich de dhaoine anns am bi thu a' cur earbsa dè, nam beachd-san, a tha thu math air agus dè anns am faodadh tu dèanamh gu math. Ma dh'fhaodte gum bi na freagairtean a' cur iongnadh ort. Ach cuimhnich, aig a' cheann thall feumaidh tu na roghainnean a dhèanamh a tha math DHUTSA.

5. Càit am faodainn a dhol leis na roghainnean seo?
Ma dh'fhaodte gum feum thu cuspairean àraid ionnsachadh gus dreuchd fhaighinn. Smaointich air dè na seòrsaichean obraichean a dh'fhaodadh a bhith freagarrach dhut.



Cuimhnich, 's urrainn dhut nì sam bith a dhèanamh a tha thu ag iarraidh. Ma tha dealas agad airson saidheans, no mas e cànanan do ghnothach-sa, 's ann agadsa a tha an roghainn!

Uidheaman airson na h-obrach

Faigh a-mach dè tha thu math air agus rannsaich do chùisean-ùidhe. Bidh seo na chuideachadh mòr nuair a tha thu a' taghadh do roghainnean.

Ma dh'fhaodte nach eil thu air a chur romhad dè tha thu ag iarraidh a dhèanamh às dèidh dhut an sgoil fhàgail, agus tha sin ceart gu leòr. Ach ma tha beachd agad air an t-seòrsa obair no gnìomhachas sam biodh tu ag iarraidh a bhith an sàs, bidh e nas fhasa dhut do roghainnean cuspair a thaghadh. Cuimhnich nach eil leithid a rud ann ri nithean as toigh le/nach toigh le balaich no caileagan, agus tha an t-aon rud fìor a thaobh neartan, sgilean, cuspairean is dreuchdan.

'S urrainn dhut a bhith ag amas air dreuchd sam bith a tha thu ag iarraidh – agus chan eil e gu diofar

dè an cinneadh dham buin thu, no an deach d' àrach ann an cùram no ma tha thu ciorramach – is coma sin uile nuair a tha thu a' taghadh dreuchd.

Clàraich air My World of Work gus cunntas a chruthachadh.

Bidh an cunntas seo pearsanaichte dìreach air do shon-sa, le molaidhean airson do dhreuchd-sa agus stiùireadh is seòladh air dè dh'fhaodas tu fheuchainn mar ath thaghadh air an làrach-lìn. Ma chuireas tu cromag sa bhogsa nuair a chlàraicheas tu, cuiridh sinn molaidhean thugad.



Lorg na nithean anns a bheil ùidh agad

An t-uidheam Mu Mo dheidhinn (About Me)

Dè bhiodh na b' fheàrr na cosnadh fhaighinn airson obair as caomh leat a dhèanamh! Cleachd an t-uidheam Mu Mo Dheidhinn (About Me) gus tuilleadh fhaighinn a-mach mu dheidhinn do phearsantachd agus molaidhean dhreuchdan fhaighinn stèidhte air na nithean as toigh leat a bhith a' dèanamh – na nithean anns a bheil ùidh agad.



Lorg do neartan

An t-uidheam Neartan (Strengths)

'S iad do neartan na nithean air a bheil thu math air a dhèanamh. Ma tha thu eòlach air do neartan, bidh an t-eòlas sin gad chuideachadh gus cuspairean is roghainnean is dreuchdan a thaghadh a bhios a' toirt a-mach rogha do nàdair. Ma dh'fhaodte gu bheil neartan agad fiù 's air nach robh thu mothachail. Feuch an fharpais-cheist air Neartan agus lorg na neartan agad fhèin!



Leasaich do sgilean

An t-uidheam Sgilean (Skills)

'S iad sgilean comasan a dh'fhaodas tu a leasachadh agus ionnsachadh gus do chuideachadh le bhith a' coileanadh gnìomhan sònraichte. Dh'fhaodadh tu sgilean ùra ionnsachadh san t-seòmar-teagaisg no san t-saor-ùine agad. Faigh a-mach fiosrachadh air càit am faodadh tu a dhol leis na sgilean agad.



A' taghadh do chuspairean

An t-uidheam Roghainnean Cuspair (Option Choices)

Cuir a-steach na cuspairean as fheàrr leat san uidheam seo, a' gabhail a-steach Preantasachdan Bun-ìre, agus faigh molaidhean air na seòrsaichean dhreuchdan gu faodadh iad do threòrachadh.



Tòisich aig myworldofwork.co.uk/subjectchoices

Càit am faodadh tu a dhol le do roghainnean?



Smaointich air an dreuchd agad mar mhapa mòr air Google Maps. Ma dh'fhaodte gu bheil an t-aon cheann-uidhe agadsa agus aig cuideigin eile sa chlas agad, ach dh'fhaodadh sibh siubhal air slighean gu tur eadar-dhealaichte airson faighinn ann.

Bidh an dreuchd agad coltach ri seo cuideachd – sin an fhìrinn! 'S e an rud a tha cudromach gum bi thu a' lorg na slighe dreuchd a tha ceart dhut fhèin. Bidh tòrr shlighean fosgailte dhut.

Preantasachdan Bun-ìre

Ma dh'fhaodte nach cuala tu, ach faodaidh tu Preantasachd Bun-ìre a dhèanamh fhad 's a tha thu fhathast san sgoil.

'S e dòigh-ionnsachaidh a th' ann, ann an AS5 is AS6, a bhios gad chuideachadh gus bunait sheasmhach a thogail airson an ama ri teachd le bhith a' toirt dhut deagh eòlas-obrach fiù 's mus fàg thu an sgoil.

Cha bhi seo mar phàirt de na roghainnean cuspair agad an turas-sa, ach tha e math a bhith mothachail air mar roghainn dhut aig ìrean nas àirde san sgoil.

Eucoltach ris na cuspairean eile agad, bidh thu a' faighinn ùine a-mach às an t-seòmar-teagaisg agus bidh thu ag obair air pròiseactan fìora aig colaiste agus le cuid de na fastaichean as motha ann an Alba.

'S e cothrom a th' ann a bhith a' feuchainn rudeigin ùr, agus dh'fhaodadh e fiù 's do chuideachadh gus d' inntinn a dhèanamh suas a thaobh dè tha thu ag iarraidh a dhèanamh mar obair.

Bidh am measgachadh de dh'eòlas-obrach agus teisteanas gad chuideachadh nuair a dh'fhàgas tu an sgoil airson obair, colaiste, oilthigh no preantasachd eile.

Gabhaidh tu Preantasachd Bun-ìre an ath thuras a nì thu roghainnean cuspair agus obraichidh tu a dh'ionnsaigh teisteanas thairis air aon no dà bhliadhna. Tha iad rim faotainn ann an raon farsaing de chuspairean.

'S iad:

- Cunntasachd
- Sgilean Gnothachais
- Einnseanaireachd Chatharra
- Meadhanan Cruthachail is Didseatach
- Einnseanaireachd
- Seirbheisean Ionmhasail
- Teicneòlasan Biadh is Deoch
- Taic airson Bathar-cruaidh agus Siostaman
- Teicneòlasan Saidheansail
- Seirbheisean Sòisealta Clann is Daoine Òga
- Seirbheisean Sòisealta agus Cùram-Slàinte
- Leasachadh Bathar-bog

Tadhail air **apprenticeships.scot/foundation** airson barrachd fiosrachaidh.

Colaiste no Oilthigh Càit am faodadh tu a dhol le do roghainnean?

Ma dh'fhaodte gur e ionnsachadh aig **colaiste** no **oilthigh** an nì ceart dhutsa. Airson cuid de dhreuchdan, leithid leigheas no lagh, 's e seo an aon dòigh sam faighear na teisteanasan riatanach.

Obair

Ma dh'fhaodte gu bheil thu ag iarraidh a dhol dìreach a-steach ann an cosnadh an dèidh dhut an sgoil fhàgail. Dh'fhaodadh tu a dhol a dh'obair gu dìreach airson fastaiche, no gnothachas a thòiseachadh dhut fhèin, no fiù 's beagan obair shaor-thoileach a dhèanamh mar dhòigh luachmhor airson fèin-fhiosrachadh air an àite-obrach fhaighinn.

Ann am preantasachd, tha thu a' dèanamh obair fhìor ach tha thu a' faighinn beagan ùine air falbh airson ionnsachadh.

Bidh Nuadh Phreantasachd a' leigeil leat a bhith ag obair, a' cosnadh agus a' faighinn teisteanas aithnichte leis a' ghnìomhachas – 's e seo teisteanas air am bi fastaichean eòlach agus air am bi iad a' cur meas.

Tha barrachd air 100 diofar sheòrsa de **Nuadh Phreantasachdan** ann, ann an ceudan de dhiofar obraichean.

Bidh **Preantasachdan aig ìre Ceumnaiche** a' leigeil leat rannsachadh airson ceum fhad 's a tha thu ag obair ann an obair cho-cheangailte.

Bidh preantasachdan gan tairgse le mìltean de chompanaidhean de dhiofar mheudan ann an iomadh diofar sheòrsa gnìomhachais ann an Alba – chan eil teagamh ann, ma-thà, gum bi aon ann a tha freagarrach dhut.



Cuimhnich, tha an **comhairliche dhreuchdan** agad san sgoil airson do chuideachadh gus na roghainnean uile a tha romhad a thuigsinn. 'S urrainn dhaibhsan do stiùireadh tro do roghainnean gus do chuideachadh an t-slighe cheart fhaighinn dhutsa. 'S urrainn dhaibh do chuideachadh gus taic a bharrachd a lorg ma tha feum agad oirre gus an tèid agad air an t-slighe a tha thu ag iarraidh a leantainn.

Obraichean san àm ri teachd



Tha dreuchdan STEM ceangailte ri saidheans, teicneòlas, einnseanaireachd agus matamataig. Tha cuspairean feumail a' gabhail a-steach Fiosaigs, Ceimigeachd, Bith-eòlas, Matamataig, Saidheans Coimpiutaireachd, Deilbh is Obair-dèanamh, Ealain. Bidh Preantasachdan Bun-ìre gad chuideachadh faighinn a-steach cuideachd.

Tha obraichean STEM airson a h-uile duine, mar eisimpleir boireannaich a bharrachd air fireannaich, daoine à gach cinneadh agus daoine ciorramach. Ann an obair STEM, bidh thu a' cruthachadh nithean agus a' fuasgladh cheistean. Bidh mòran dhiubh a' toirt a' chothrom dhut a bhith ag atharrachadh an t-saoghail!

Gabhaidh a leithid a dhèanamh nas fheàrr far a bheil sgiobaidhean ann a tha air an dèanamh suas de dhiofar dhaoine le diofar bheachdan. Mar sin, 's fhiach beachdachadh air obraichean STEM nuair a tha thu a' taghadh do roghainnean. Ionnsaich mu na tha comasach aig My World of Work.

Teicneòlas Didseatach



Tha Alba a' toirt dachaigh do chuid de na companaidhean teicneòlais as inntinniche san t-saoghal. Tha feum aig cha mhòr a h-uile fastaiche ann an Alba air daoine aig a bheil sgilean teicneòlais dhidseataich.

Ma dh'fhaodte gur tusa an ath:

- Còdair
- Dealbhaiche
- Hacair beusail (Ethical hacker)
- Leasaiche ghèamaichean
- Einnseanair robotaireachd
- Neach-saidheans dàta
- Deuchainniche

Cumhachd agus an Àrainneachd




Tha iomadh preantas a-cheana ag obair sa ghnìomhachas an-dràsta, a' gabhail a-steach einnseanairean a bhios a' cuideachadh gus beachd-smuaintean a thoirt gu bith. 'S e gnìomhachas inntinneach agus ioma-chùiseach a th' ann, agus dh'fhaodadh tu a bhith ag obair ann an oifis, ann an deuchainn-lann, aig muir no fiù 's fon talamh.

Ma dh'fhaodte gur tusa an ath:

- Einnseanair ceimigeach
- Einnseanair deilbh
- Micro-bith-eòlaiche
- Cuan-eòlaiche
- Manaidsear pròiseict
- Teicneòlaiche Crann-gaoithe

Saidheansan Beatha



Gheibhear ann an Alba aon de na coimhearsnachdan saidheansail as motha san Roinn-Eòrpa. Cuideachd, tha sinn ainmeil airson rannsachadh iongantach, lorg dhrogaichean agus uidheaman meidigeach a tha a' cuideachadh gus galaran a leighis agus càileachd na beatha a chur am feabhas.

Ma dh'fhaodte gur tusa an ath:

- Eòlaiche-gintinneachd
- Teicneòlaiche Deuchainn-lann
- Bith-eòlaiche mara
- Teicneòlaiche-leigheasan
- Rannsaiche saidheans

Cùram-slàinte, Cùram-cloinne agus Cùram Sòisealta



Tha mòran bhuidhnean ann a bhios a' cuideachadh gus cùram a ghabhail orrasan, agus taic a thoirt dhaibhsan, aig a bheil am feum as motha air. Tha caochladh farsaing de dh'obraichean ann san raon seo, bho dhreuchdan a dh'aithnicheadh tu, leithid nurs agus obraiche no manaidsear cùram-chloinne, gu feadhainn air nach faodadh tu a bhith eòlach, leithid leasaiche-cluiche, oifigear airson còraichean shochairan no neach-cleachdaidh cuislearachd (phlebotomist).

Ma dh'fhaodte gur tusa an ath:

- Eòlaiche-èisteachd
- Cùramaiche
- Manaidsear Sgoil-àraich
- Dotair
- Nurs
- Neach-eiridinn
- Neach-taice

Obair-togail




Am b' urrainn dhut a bhith nad phàirt de sgioba a bhios a' togail an ath structar leithid Cuibhle na h-Eaglaise Brice no Drochaid na Banrighinn?

Ma dh'fhaodte gur tusa an ath:

- Teicneòlaiche ailtireachail
- Manaidsear obair-togail
- Neach-comhairle slàinte is sàbhailteachd
- Fearann-mheasadair
- Einnseanair structarail

Sgilean Stiùireadh Dhreuchdan



Chan eil thu nad aonar

'S dòcha gun cuala tu roimhe mu Sgilean Stiùireadh Dhreuchdan bhon chomhairliche dhreuchdan agad.

Fhad 's a tha thu a' dol tron sgoil, bidh thu a' cumail ort a' leasachadh nan sgilean seo.

'S iad Sgilean Stiùireadh Dhreuchdan na sgilean fad-bheatha a dh'fheumas tu gus co-dhùnaidhean dreuchd a dhèanamh, eadar gu bheil iad beag no mòr.

Nuair a tha thu a' taghadh do roghainnean, tha an comhairliche dhreuchdan agad san sgoil agad airson do chuideachadh.

Dh'fhaodadh tu a bhith an dùil gum faigh thu:

- seisean anns am bi am fòcas ga chur air mar a nì thu roghainnean-cuspair fiosraichte
- an cothrom comhairle aghaidh-ri-aghaidh fhaighinn leis a' chomhairliche dhreuchdan agad gus dèanamh cinnteach gu bheil fios agad air na roghainnean uile a tha fosgailte dhut agus, rud a tha nas cudromaiche, gu bheil thu gan tuigsinn.



Cuimhnich gum faod thu do phàrant, neach-cùraim no tidsear (no a h-uile duine dhiubh!) a thoirt còmhla riut don t-seisean aghaidh-ri-aghaidh agad. Iarr air a' chomhairliche dhreuchdan no tidsear agad innse dhut mar a nì thu agallamh gus beachdachadh air do roghainnean cuspair, agus sgrìobh sìos am fiosrachadh sin air duilleag-chùil na h-iris seo.

Cò th' annam? Mi fhìn

Tha seo mu dheidhinn eòlas fhaighinn air cò th' annad – do neartan agus do luachan, dè tha cudromach dhut agus dè bhios gad chumail a' dol.

Dè tha mi math air? Neartan

Tha seo mu dheidhinn eòlas agus tuigse fhaighinn air dè an stuth a tha thu math air. Tha e mu dheidhinn do sgilean agus mar a ghabhas an cleachdadh ann an diofar dhòighean.

Dè tha a-muigh an siud dhòmhsa? Na tha air fàire

Tha seo mu dheidhinn eòlas fhaighinn dè tha a-muigh an siud ann an saoghal na h-obrach.

Tha e mu dheidhinn tuigse fhaighinn air dè seòrsa obraichean a th' ann, dè na gnìomhachasan a th' ann, agus na dòighean uile sam b' urrainn dhut deisealachadh airson obair.

Cò a dh'fhaodas mo chuideachadh? Lìonraidhean

Tha seo mu dheidhinn nan daoine a tha timcheall ort agus mar a dh'fhaodas iadsan do chuideachadh gus faighinn air adhart leis an dreuchd agad. Tha e cuideachd mu dheidhinn mar a dh'fhàsas tu eòlach air daoine a dh'fhaodadh do chuideachadh agus mar a chumas tu ann an co-luadar riutha.

A' coinneachadh ris a' Chomhairliche Dhreuchdan agad

An Stòiridh agamsa

Mus do rinn mi mo roghainnean cuspair, bhruidhinn sinn mu dheidhinn chuspairean, roghainnean agus dreuchdan rè nan leasan Eòlas Pearsanta agus Sòisealta, agus bhathar a' sealltainn dhuinn ciamar a chleachdas sinn an làrach-lìn My World of Work.

Air an làrach-lìn, choilean mi na h-earrannan Mu Mo Dheidhinn (About Me), Miann-adhartais (Ambition) agus Nertan (Strengths), oir bha mi **feòrachail** mum dheidhinn fhìn agus mu dè bha mi math air. B' e na dreuchdan a chaidh a mholadh dhomh dreuchdan air an robh mi air a bhith a' beachdachadh, ach cha robh mi air **fòcas** a chur air an fhiosrachadh uile a bha a dhìth orm. Bha an làrach-lìn cuideachd a' moladh nan cuspairean sgoile agus roghainnean air am bu chòir dhomh beachdachadh.

Thàinig an comhairliche dhreuchdan a-steach don chlas Eòlas Pearsanta agus Sòisealta againn, agus rinn sinn grunn ghnìomhachdan a bha a' sealltainn diofar shlighean a-steach do dhreuchdan agus na dh'fheumamaid gus deagh roghainnean cuspair a dhèanamh.

Bha cothrom againn cuideachd air còmhradh aghaidh-ri-aghaidh leis a' chomhairliche dhreuchdan, agus bha mi a' faireachdainn gum b' e deagh chothrom a bha seo gus dèanamh cinnteach

gum b' e na roghainnean air an robh mi a' smaointinn na roghainnean cearta. A chionn 's gum faod mi a bhith beagan nearbhach, bha cothrom agam air cuideigin a thoirt còmhla rium.

Bha an ùine a bh' agam leis a' chomhairliche dhreuchdan neo-chabhadh agus càrdeil, agus dh'èist iad ris na bha mi airson a ràdh. Chuidich iad mi a bhith a' faireachdainn **fiosraichte** agus chuidich iad mi gus smachd a ghabhail air na co-dhùnidhean agam aig an àm chudromach seo.

Le comhairle agus taic bho My World of Work agus bhon chomhairliche dhreuchdan agam, tha mi a-nis ag ionnsachadh nithean a tha a' còrdadh rium – agus tha **misneachd** agam gum bi iad gam chuideachadh leis na planaichean dreuchd agam san àm ri teachd.

Bi fòcusaichte

Seo àm airson co-dhùnidhean a dhèanamh.

Bi fiosraichte

Cleachd a h-uile uidheam, pìos-fiosrachaidh agus lìonra a th' agad.

Bi feòrachail

Na cùm sìon air ais ... cuir a h-uile ceist ris a bheil feum agad air freagairt.

Bi uile mu do dheidhinn-sa

Dèan co-dhùnidhean matha a bhios ceart dhut fhein – chan ann do dhuine sam bith eile. Tagh na bhios gad dhèanamh sona agus na bhios a' toirt ort faireachdainn air bhioran mu dheidhinn an ama ri teachd dhut.



Tòisich air



Plana Gnìomha

1. Clàraich air **My World of Work**
2. Coilean an fharpais-cheist **Mu Mo Dheidhinn (About Me)**
3. Feuch an t-uidheam **Nearthan (Strengths)**
4. Feuch an t-uidheam **Sgilean (Skills)**
5. Cleachd an t-uidheam **Roghainnean Cuspair (Option Choice)**

Tadhail air myworldofwork/subjectchoices

'S e My World of Work an làrach-lìn dhreuchdan agad, a tha loma-làn de ghnìomhan, uidheaman agus stiùireadh gus do chuideachadh a bhith a' dèanamh nan co-dhùnidhean cearta airson an ama ri teachd dhut.

Mar as motha am fiosrachadh a bheir thu seachad mu do dheidhinn-sa, 's ann as fheàrr a bhios na molaidhean a gheibh thu.

Clàraich airson puist-dealain agus bidh sinn gad chuideachadh le stiùireadh agus seòladh air an t-slighe.



Trobhadh agus bruidhinn rinne!

Cleachd an t-àite seo gus ainm a' chomhairliche dhreuchdan agad a sgrìobhadh sìos agus càit am faighear iad san sgoil agad.



Cuimhnich

Faodaidh do phàrant, neach-cùraim no tidsear – no a h-uile duine dhiubh – tighinn còmhla riut don chòmhradh leis a' chomhairliche dhreuchdan agad mu dheidhinn do roghainnean. Iarr air a' chomhairliche dhreuchdan agad innse dhut mar a chuireas tu agallamh air dòigh agus sgrìobh sìos am fiosrachadh an seo:



Gabh pàirt sa chabadaich againn!

Airson tuilleadh mholaidhean is stiùireadh air dreuchdan agus roghainnean cuspair, cùm sùil a-mach airson **My World of Work** air:



Mu dheidhinn Leasachadh Sgilean na h-Alba

Is sinn am buidheann sgilean nàiseanta a bhios a' toirt taic do mhuinntir is gnothachasan na h-Alba gus na sgilean aca a leasachadh agus a chur an gnìomh. Tha Comhairlichean Dhreuchdan againn, a tha làn teisteanachta agus fiosrach, sa h-uile àrd-sgoil ann an Alba. A bharrachd air sin, tha lionra againn de dh'ionadan dhreuchdan air àrd-shràidean air feadh na dùthcha. Tha iad seo uile dealasach air an cuideachadh a tha a dhìth a thoirt do dhaoine airson na dreuchd a tha iad ag iarraidh. Tha sinn cuideachd ag obair le gnìomhachas gus na builean as fheàrr a ghabhas a libhrigeadh do mhuinntir, gnothachasan agus eaconamaidh na h-Alba.

Tha ar n-obair ann an sgoiltean ann an co-rèir ri Inbhe Foghlam Dhreuchdan, ris a' Churraicealam airson Sàr-mhathais agus ris na builean aig Leasachadh Sgioba-obrach Òg na h-Alba. SDS-1430-Oct18